



## Nastavljeno suđenje sutkinji Azri Miletić

# Uposlenik SIPA-e otkrio kako je došlo do pokretanja istrage

U Sudu BiH jučer je nastavljeno suđenje sutkinji Azri Miletić, koja je optužena za primanje dara. Na jučerašnjem ročištu istražitelj Državne agencije za istrage i zaštitu (SIPA) Sedin Salčinović ispričao je kako je došlo do pokretanja istrage protiv sutkinje Apelacionog vijeća Suda BiH.

Svjedok, koji radi u kriminalističko-istražnom uredu **SIPA-e**, kazao je da je njega kontaktirao informator s podacima o korupciji u pravosuđu. Ispričao je, kako je rekao svjedok, da je sutkinja Miletić postavljena u predmetu "Ramo Brkić i drugi", kao i da je zaštićeni svjedok S-1 s njom u dobrim odnosima.

Nakon toga iz **SIPA-e** su počeli provjeravati njegove navode te napravili službenu zabilješku u septembru 2014. godine i poslali Tužilaštvu



*Miletić: Optužena za primanje dara*

BiH. Salčinović je rekao da je tek nakon 40 dana iz Tužilaštva stigao odgovor da je otvoren predmet protiv Miletić. Svjedok Salčinović kazao je da su zatim tražili da provedu posebne istražne radnje, odnosno prislušivanja i tajno praćenje, za šta je Sud BiH izdao naredbu u oktobru 2014. godine. **E.Ma.**